

四庫全書

史部

欽定四庫全書

夢梁錄卷七

宋 吳自牧 撰

杭州

杭城號武林又曰錢塘次稱胥山隋朝特敕立次郡杭
僅三十六里九十步後武肅錢王發民丁與十三寨軍
卒增築羅城週圍七十里許有南城門稱為龍山東城
門號為南土北土保德北城門名北關今在餘杭門外
人家門首有青石塾是也西城門曰水西關在雷峯塔

前城中有門者三曰朝天門曰

闕

門曰鹽橋門宋太

平興國年間錢王納土

闕

安有號為寧海軍高

廟於紹興歲南渡

闕

此遂稱為行在所其地

襟江抱湖川湊

闕

行民物阜蕃非殊方下郡

比也自歸宋

闕

易名旱門僅十有三水門者

五城南門者

闕

嘉會城樓綯綵為諸門冠蓋此門為

御道遇南郊五輅欲此幸郊臺路城東門者七曰北水

門曰南水門蓋禁中水從此流注出鍤沙河及橫河橋

下其門有鍊牕柵鎖閉不曾輒開曰便門曰候潮門曰保安水門河通跨浦橋與江相隔耳曰保安門俗呼小堰門也曰新開門城東門者三曰崇新門俗呼薦橋門曰東青門俗呼菜市曰艮山門城北門者三曰天宗水門曰餘杭水門曰餘杭門舊名北關是也蓋此門浙西蘇湖常秀直至江淮諸道水陸俱通城西門者四曰錢塘門曰豐豫門即湧金曰清波即俗呼閘門也曰錢湖門其諸門內便門東青艮山皆甃城水門皆平屋其餘

旱門皆造樓閣諸城壁各高三丈餘橫闊丈餘禁約嚴切人不敢登犯者準條治罪城內元三門俱廢之獨朝天門止存兩城壁杭人獨以門稱之

大河橋道

自和寧門外登平坊內曰登平橋次曰六部橋即都亭驛橋北曰黑橋兒玉牒所對巷曰州橋執政府大渠南曰安永橋次曰國清橋投東轉北曰保安延壽橋榷貨務東曰阜民橋不通舟楫合同塲前曰過軍橋雜賣塲

西曰通江橋沿大河直至曰望仙橋次曰崇陽宮橋介
真道館前曰三聖橋榮王府前曰佑聖觀橋沿河看位
前曰榮王府橋常慶坊東北曰太和樓橋俗名柴垛富
樂坊東曰薦橋北曰豐樂橋善履坊東曰油蠟局橋元
呼新橋興福坊東曰鹽橋上奉廣福孚順孚惠孚佑侯
蔣相公祠橋東一直不通水旱橋名蒲橋咸淳倉前曰
咸淳倉橋元名東橋御酒庫東曰塌坊橋仙林寺東曰
仙林寺橋平糴倉北曰西橋豐儲倉後曰葛家橋東曰

通濟橋俗名梅家橋御酒庫北曰小梅家橋通濟橋北
曰田家橋次曰普濟橋白洋池前曰白洋池橋次曰方
家橋自大河直通天宗水門至三閘也

小河橋道

自宗陽宮橋轉西河曰鍾公橋次曰清冷橋南瓦子前
曰熙春樓橋南瓦內投西曰灌肺嶺橋通和坊東曰金
波橋北曰普濟橋次曰巧兒橋寶佑坊曰寶佑橋五間
樓巷東曰亨橋賢福坊東曰平津橋俗名貓兒橋橋北

曰舍人橋次曰永清橋鐵線巷西曰水巷橋次曰新橋
義和坊曰芳潤橋元名炭橋武志坊東曰李博士橋次
曰棚橋新安坊東曰新安橋出御街投北曰衆安橋投
東入延定坊曰鵞鴨橋次曰安國橋又名北橋橋北曰
軍頭司橋懷遠坊出御街投北曰

關

橋橋之西曰貢

院橋次曰藩封酒庫橋雜作院西曰祥符橋橋西曰小
新莊橋普寧坊東曰清遠橋仁和縣衙對巷曰仁和倉
橋縣巷北曰萬歲橋六部架閣庫前曰天水院橋淳祐

倉前曰倉橋次曰永新橋出餘杭水門亦由於三閘水路也其衆安與觀橋皆平坦與御街同蓋四孟車駕經由此兩橋轉西禮部貢院路一直過新莊橋詣景靈宮行孟饗禮也

西河橋道

自衆安橋轉西曰衆樂橋次曰下瓦子橋沂王府北曰結縛橋十官宅前曰石灰橋次曰八字橋元呼洗麤橋南曰馬家橋次曰鞞鼓橋清河坊東曰洪橋次曰井亭

橋曰施水坊橋西橫街有橋名曲阜其橋不通舟楫水脈自六房院後石橋下湖水從此流出也韓府南曰軍將橋次曰三橋子西樓酒庫前曰惠遷橋元呼金叉庫橋羅漢洞巷對曰侍郎橋向有侍郎姓廉名郎叔居此又有賢德及人里巷賢之以盛名以橋記之南真道館前曰施家橋斷河頭五顯祠後曰普濟橋再自八字橋轉西曰清湖橋次曰黑橋左藏庫前曰左藏庫橋楊駙馬宮前投西曰安濟橋潘國巷路通接洋街路曰安福

橋直抵故太學次曰丁家橋霍史居廟前曰長生老人
橋錢塘縣巷曰縣橋跨真珠河曰真珠河橋此兩橋俱
不通舟國子監前曰紀家橋監後曰車橋側曰青龍橋
茶湯巷西曰長壽橋舊名楊姑橋萬壽觀前曰新壯橋
景靈宮前曰車馬橋鎮城倉西曰師姑橋餘杭門裏中
正橋元呼斜橋水門前曰釣橋舊名便橋水路出餘杭
水門通三閘也

小西河橋道

自西樓酒庫側三橋南入惠遷橋西過惠遷井曰太常
寺後小橋次曰臺官衙後門橋六房省院對曰如意橋
度牒庫後巷曰永安橋即五聖廟橋西曰渡子橋次曰
湧金橋界于誦金三池之中矣湧金門北沿城鑷子井
東曰鑷子井橋張府後俞家園東曰永安橋六房後門
曰石橋此三橋俱不通舟湖水永於橋下暗溝注於曲
阜橋下流出西河俞家園九官宅闕曰白蓮橋花宅北
投西巷曰紅蓮花橋兩橋俱旱橋耳又自渡子橋轉南

轉運司衙前曰普安橋油車巷對曰德壽橋府學前曰
凌家橋謝二郎使前曰定安橋慈幼居前曰戒子橋樓
店務橋次曰流福橋元呼閘兒橋臨安府治前曰州橋
俗名懊來橋蓋因到訟庭者到此心已悔也故以此名
呼之

倚郭城南橋道

城南所管地界自白塔嶺下橋曰進隆兒門裏夏家橋
交木場後曰楊婆洋泮橋東曰李家橋本廂治所南曰

洋泮橋馬倉巷口名紅橋子美政坊前曰美政橋雪醅
庫東曰南新橋俗呼朱橋嘉會門外曰利涉橋酒庫巷
內曰工梁家橋顏家樓對巷曰下梁家橋浙江亭側跨
浦橋便門外投南橫河橋布行前亦名橫河橋鰲園前
曰渾水閘橋南外庫南曰蕭公橋大郎巷口曰工泥橋
南外酒庫對巷曰清水閘橋候潮門外南曰衆惠橋護
聖步軍南曰下泥橋候潮門外直東曰工櫓木橋又名
普濟白旗寨對巷曰下櫓木橋護聖工教場門東曰上

洪橋中教場門東曰中教場橋下教場門東曰柴市橋
盛家街東曰濟衆橋妙靜寺北曰諸家橋橋西曰保安
閘橋保安水門外曰保安橋新門口門外富景園東名
昇仙橋此是旱橋一直向東曰南新草橋城東駱家跳
曰駱家橋西首寨前曰馬軍橋橋東寨前曰步軍橋善
應寺北曰四板橋橋西曰萬壽橋又名呂家橋景隆觀
後曰通利橋次曰米市橋老兒營後曰五柳園橋北曰
福濟橋又名席潭崇新門外直東曰章家橋北曰淳祐

橋供聖營東曰螺螄橋小粉場前曰普安橋又名橫河
橋東曰廣濟橋蒲場巷軍巡鋪前安濟橋遊奕教場門
曰教場門橋橋東橫河軍巡鋪前曰報恩橋螺螄橋北
蟹行曰蔡湖橋遊奕軍佑聖殿後曰遊奕寨橋橋北曰
安榮橋南路曰小蔡湖橋殿司雙寨門前曰前軍橋東
青門外直東曰菜市橋選鋒軍東曰太平橋北曰端平
橋東青門曰十善橋次曰黃姑橋艮山門東曰順應橋
舊名壩子橋仁和尉司前曰無星橋法明寺前曰駱駝

橋寺門外走馬塘曰璽橋尉司後曰龔家橋沙河角頭
水陸寺北曰韋家橋橋側曰廣度橋走馬塘東石斗門
鋪前曰石斗門橋尉司側曰木板橋沙河角頭曰宋家
橋城東鄭家園後曰翁泰橋次曰馮家橋章家橋姚店
橋園後麥莊廟前曰麥莊橋城東九里松大路曰樟木
廟橋廟前曰江家橋城東廬家雪簪南曰行人橋走馬
塘范家村曰張娜兒橋姚斗門鋪曰新塘橋石斗門鋪
前曰蔡家大橋城東蔡家村曰蔡家小橋高塘灣橫塘

路曰姚馬四橋城東官園裏曰鴨舍橋橋大路曰李家
橋官園裏北曰孫家橋金家村曰猪坊橋姚斗門鋪唐
家村曰資福橋曰小資福橋斗門東南陸家村曰陸家
橋沈家塘口曰歐家橋斗門南大路曰升仙橋看經寺
前曰看經橋城東胡陳畝等處其橋有九名曰范家徐
家李家陳家杜家姚家仲家橋普寧錢下厠等橋五里
塘路口張家橋橋側曰菩薩橋殊勝寺前曰殊勝橋塘
大路王家橋行人菴側曰嚴家橋塘東曰新橋橋側曰

鮑家橋塘西飛家橋

倚郭城北橋道

城北所管地界自錢塘尉司西水磨頭曰石函橋又呼
西石頭橋西湖孤山路曰寶佑橋俗呼斷橋孤山路中
曰涵碧橋和靖林處士故居所曰處士橋延祥四聖觀
西曰西林橋蘇堤南來第一橋曰映波第二橋曰鎖瀾
第三橋曰望山第四橋曰壓堤第五橋曰東浦第六橋
曰跨虹先賢堂前橋曰袁公橋蓋府尹袁大資建堂造

橋以名記之麴院新堤路小橋曰小新堤橋麴院大路
向東曰行春橋九里松左軍教場大路西有橋亦名曰
行春飛來峯路口曰合澗橋龍井路口曰歸隱橋蓋東
坡欲易於過溪建此橋也麥嶺西太清宮前曰孝義橋
嶺口寨前曰新河橋麥嶺至龍井其橋有三曰善安永
安永福橋茆家步至丁家山有橋者三曰雙井丁家山
小丁家山橋高麗寺側曰惠因橋淨慈寺北慶樂園前
曰長橋錢湖門外沿城海子口隅下曰清化橋清波門

外流福水路橋聚景園前曰聚景橋顯應觀前曰顯應
觀橋湧金門外城北水口上曰相國西橋九曲小渡咸
淳新建橋曰九曲昭慶橋大昭慶寺前曰昭慶廣濟橋
寺西寨前曰策選寨橋昭慶教場西曰教場橋教場橋
北曰崇福橋霍山大路口曰羊坊橋霍山行宮巷口曰
保安橋羊坊巷北曰溜水橋精進寺北曰小溜水橋溜
水橋西北曰沈家場橋橋前一帶曰安民橋西馬塍觀
音庵西曰八字橋運司竹木塲前曰馬軍橋羊角埂工

有橋者四曰上泥下泥崇壽閭家橋馬塍烏盆塲曰富
春橋又名烏盆橋羊角埂西雙寨門曰策選馬軍橋埂
西入裏曰神勇步人橋本州試院前曰大通橋王家橋
試院東曰道姑橋試院西曰清水橋石塘東曰西堰橋
古塘橋東曰方公橋西觀音橋城西銅錢局前曰古塘
橋古塘裏西曰惠安橋北郭務前曰餘杭橋天宗水門
外曰上堰橋餘杭橋側曰下堰橋北郭稅務北曰塘餅
橋神勇鋪曰過軍橋上閘南曰上斗門橋下斗門西曰

永興橋上閘南曰中斗門橋上閘東陸家塲前曰天宗
棧庫橋餘杭門外上閘頭曰上閘橋上閘北中閘頭曰
中閘橋中閘西曰唐家橋又名壽安橋中閘北下閘頭
曰下閘橋米市橋南曰浴堂橋下閘西北曰米市橋米
市裏曰黑橋麻線巷曰採蓮橋夾城巷口曰袁家橋德
勝橋北曰下斗門橋舊瓦子後曰鄧家橋又名廣利橋
石牌頭巷內曰袁公橋糴塲後德勝橋舊名堰橋因韓
太尉掩擊苗傅故杭人稱之曰長板橋曰楊婆橋下界

倉後曰高家梁婆張家三橋五里塘大路曰東新橋莫家場前曰范婆橋元係小石橋魚行裏曰水冰橋接待寺南曰望佛橋橋西曰復明橋一名倪郎中橋橋東曰雷道橋魚行裏曰黑橋接待寺前曰香火橋北外酒庫南大路曰佐家橋西倉南曰寶慶又名葱版螭螭豐儲西倉前曰西倉橋倉北曰洞霄道院橋城北廂巷口曰富春橋一名茆家橋西倉北醋坊橋官界巡司東曰吳家橋司西曰黃家橋江漲稅務東曰江漲橋橋西南曰

歸錦橋瓜山涇巷口曰洪橋巷東曰社公橋董家巷北
曰獅子橋喻家橋橋側葛家余家二橋喻家橋西葉家
橋北新東曰費家橋北新南曰羊棚橋橋北曰北新橋
元名中興永安橋北新隅北曰康家橋橋側曰豐惠橋
正等鋪曰印墓橋康家橋北塘上曰板橋

禁城九廂坊巷

在城九廂界各廂一員小使臣注授任其煙火盜賊救
解所屬其職至微所統者軍巡火下地分以警其夜分

不測耳曰宮城廂廡坊巷東至嘉會門禁城角西至中
軍壁小寨門南至八盤嶺北至便門巡鋪城角矣在一
南廂所管坊巷曰大隱安榮懷慶和豐並在清和坊內
一帶南首左一北廂所管坊巷曰吳山坊即吳山井巷
清和坊與南瓦子相對融和坊即灌肺嶺巷新街融和
之北太平坊通和相對市南坊即巾子巷市西坊俗呼
壩頭又名三橋街並在御街西首一帶南新街御史臺
相對康裕坊俗呼八作司巷後市街吳山北坊西相對

泰和坊俗呼糯米倉巷天井坊即天井巷舊名通潮坊
稍西龍舌頭路中和坊元呼樓店務巷舊名淨因坊仁
美坊俗呼石坂巷在通判北廳之東近民坊府治東流
福坊府治前西豐裕坊凌家橋西美化坊府學西八巷
並在清和坊北首一帶直至州府沿河至府學前凌家
橋西左二廂所管坊巷自修義坊俗呼菱椒巷即肉市
富樂坊俗呼賣馬巷衆樂坊俗呼虎跑泉巷教睦坊俗
呼狗兒山巷積善坊即上百戲巷秀義坊即下百戲巷

壽安坊俗名官巷修文坊即舊將作監巷里仁坊元名
陶家巷保信坊呼剪刀股巷定民坊即中棚巷睦親坊
俗呼宗學巷純禮坊元名後洋街巷保和坊舊稱磚街
巷報恩坊俗名觀巷已工在御街西首一帶福德坊在
保和坊巷內招賢坊仁和縣前對巷登省坊縣衙相對
係郭宰買民地初開此坊耳左三廂所管坊巷欽善坊
井亭橋南間扇子巷井泉坊相國井巷口與井亭橋對
清風坊莊文府南活水巷清河坊洪福橋西楊和王府

前興慶坊結縛橋對前洋街德化坊舊木子巷在潘閭巷口字民平易俱在錢塘縣前右二廂所管坊巷孝仁登平二坊和寧門外西東壽域坊太廟南糧料院巷天慶坊即天慶觀巷保安坊元呼廟巷懷信呼糴糴巷長慶坊入忠清廟路已上並在大街東西新開坊清平巷轉東上抱劍營路長慶坊都稅務南柴垛橋巷富樂坊薦橋西右二廂所管坊巷清平坊即舊沙皮巷通和坊金波橋路寶佑坊即福王府看位一直路賢福坊即壩

東貓兒橋巷蘭陵坊水巷橋巷義和坊元呼炭橋巷武志坊元李博士橋巷戒民坊俗呼棚橋巷為市曹行州之地新安坊名為新橋樓巷延定坊鷺鴨橋巷安國坊即北橋巷懷遠坊舊呼軍頭司營巷普寧坊在觀橋之北即清遠橋巷皆在御街東首一帶同德坊舊呼燈心巷在大街北嘉新坊北庫東西北呼七郎堂巷教欽坊呼竹竿巷北酒庫東面南新開南巷薦橋富樂坊對新開北巷曰新橋東右三廂所管坊巷東巷坊即上中沙

巷西巷坊名下中沙巷豐禾坊全皇后府東善履坊即
芳潤橋東興禮坊鹽橋下西境昌樂坊蒲橋東右四廂
所管坊巷名曰興禮自崇陽宮牆之東至傳法寺佑聖
觀郭謝太后宅福田宮出街直到寧海坊俱屬所統也
蓋杭舊有坊巷廢之者七如羅漢洞舊有坊名美俗三
橋湧金路舊名會昌坊洪橋揚府巷元作紫雲坊癸平
街巷為從訓坊馬家橋西曾立孝慈坊洗麤橋南北二
岸謂之通寶豐財二坊惟後人不可不知姑並述之

夢梁錄卷七

欽定四庫全書

史部

夢梁錄卷八至十

詳校官鴻臚寺少卿臣梁景陽

編修臣程嘉謨覆勘

總校官原任中允臣王燕緒

校對官中書臣袁文邵

謄錄監生臣汪璉

欽定四庫全書

夢梁錄卷八

宋 吳自牧 撰

大內

大內正門曰麗正其門有三皆金釘朱戶畫棟雕甍覆以銅瓦鐫鏤龍鳳飛驤之狀巍峩壯麗光耀溢目左右列闕亭百官待班閣子登聞鼓院檢院相對悉皆紅杈子排列森然門禁嚴甚守把鈴東人無蔽轍入仰視至晡時各門下青布幕護之麗正門內正衙即大慶殿遇

明堂大禮正朔大朝會俱御之如六參起居百官聽麻
改殿牌為文德殿聖節上壽改為紫宸進士唱名易牌
集英明裡為明堂殿次曰垂拱殿常朝四參起居之地
內後門名和寧在孝仁登平坊巷之中亦列三門金碧
輝映與麗正同把守衛士嚴謹如人出入守闔人高唱
頭帽號門外列百寮待班閣子左右排紅杈子左設閣
門右立待漏院客省西方館入登平坊沿內城有內門
曰東華守禁尤嚴沿內城向南皆殿司中軍將卒立寨

衛護名之中軍聖下寨寨門外左右俱置護龍水池沿寨向南有便門謂之東便門禁庭諸殿更有者十曰延和曰崇政曰福寧曰復古曰緝熙曰勤政曰嘉明曰射殿曰選德曰奉神御殿名欽先孝思之殿更有天章諸閣奉藝祖至理廟神御御書圖製之籍寶瑞之閣建於六部山後供進御膳即嘉明殿在勤政殿之前勤政即木幃寢殿也嘉明殿相對東廊門樓乃殿中省六尚局御厨祗應內侍人員俱集於此殿上常列禁衛兩重時

刻提警出入甚嚴內皆近侍中貴殿之廊廡皆知省御
藥御帶門司內轄等官幕次聽候宣喚小園子快行親
從輦官黃院子內諸司司屬人員等上番者俱聚於廊
廡祇候服役如宮禁買賣進貢皆由此入惟此處浩穰
每遇進膳自殿中省對嘉明殿禁衛成列約闌不許過
往省門上有一人呼唱謂之撥食次有紫衣裹捲脚幘
頭者謂之院子家拓一合用黃綉龍合衣籠罩左手攜
一條紅羅綉手巾進入於此樣約十餘合繼後又拓金

瓜合十餘合進入若非時取喚名曰汎索皇太后殿名曰坤寧皇后殿名和寧兩殿各有大官及殿長內侍及黃院子幕士殿屬親從輦官等人祇候諸宮妃嬪等位次亦有內侍提舉各閣分官屬掌牋奏院子小園子等人祇值和寧門外紅杈子早市買賣市井最盛蓋禁中諸閣分等位宮娥早晚令黃院子收買食品下飯於此凡飲食珍味時新下飯奇細蔬菜品件不缺遇有宣喚收買即時供進如府宅貴家欲會賓朋數下位品件不

下一二十件隨索隨應指揮辦集片時俱備不缺一味
夏初茹瓠新出每對可值十餘貫諸閣分貴官爭進增
價酬之不較其值惟得享時新耳

德壽宮

德壽宮在望仙橋東元係秦太師賜第於紹興三十二
年六月戊辰高廟倦勤不治國事別創宮庭御之遂命
工建宮殿扁德壽為名後生金芝於左棟改殿扁曰康
壽其宮中有森然樓閣扁曰聚遠屏風大書蘇東坡詩

賴有高樓能聚遠一時收拾付閑人之句其宮禦四面
遊翫庭館皆有名扁東有梅堂扁曰香遠栽菊間芙蕖
修竹處有榭扁曰梅坡松菊三徑醑醑亭扁曰新妍木

闕

堂扁曰清新芙蕖岡南御宴大堂扁曰載忻荷花亭

扁曰謝聽臨賦金林檎亭扁曰燦錦池上扁曰至樂郁
李花亭扁曰半綻紅木犀堂扁曰清曠金魚池扁曰瀉
碧西有古梅扁曰冷香牡丹館扁曰文杏又名靜樂海
棠大樓子扁曰浣溪北有櫺木亭扁曰絳葉

闕

香亭前

栽春桃扁曰倚翠又有一亭盤扁曰松闕高廟雅愛湖

山之勝於宮中鑿一池沼引水注入疊石為山次像飛
來峯之景有堂扁曰冷泉孝廟觀其景曾賦長篇詠曰
山中秀色何佳哉一峯獨立名飛來參差翠麓儼如畫
石骨蒼潤神所開忽聞彷彿像來宮園指顧已驚成列岫
規模絕似靈隱前面勢恍疑天竺後孰云人力非自然
千巖萬壑藏雲煙上有崢嶸倚空之翠嶺下有潺湲漱
玉之飛泉一堂虛敞臨清沼密蔭交加森羽葆山頭草

木四時春閱盡歲寒人不老聖心仁智情幽閒壺中天
地非人間蓬萊方丈渺空濶豈若坐對三神山日長雅
趣超塵俗散步逍遙快心目山光水色無盡時長將把
向盃中綠高廟覽之欣然曰老眼為之增明後孝廟受
禪議德壽宮改扁曰重華御之次憲明太皇欲御又改
為慈福宮壽域皇太后亦改宮扁曰壽慈御之繼後宮
室空閑因此而廢咸淳年間度廟臨政以地一半營建
道宮扁曰宗陽以奉感生帝其時重建殿廡雄麗聖真

威嚴宮園花木靡不榮茂裝點境界又一新耳一半改
為民居圓地改路自清河坊一直築橋號為宗陽宮橋
每遇孟享車駕臨幸行燒香典禮橋之左右設帥漕二
司起居亭存焉

太廟

太廟在瑞石山紹興間建正殿七楹十三室二車十駕
款謁禮後又幸建康改為聖祖殿復奉神主還杭仍復
奉安於此禮部太常寺遵典行郊裡禮前一日朝饗太

廟仍設七祀板位於殿廡橫階之北又設配饗文武功臣自韓王趙普已下二十五位於橫階之南後部寺奏請增建廟室後西增六楹通舊十三楹為一室東西二楹為夾室及增廊廡作西神門冊寶殿祭器庫屋建齋殿及致齋閣子四十有四楹咸淳間添置一室奉理廟神主通為一十四室皆正中又築二成之臺為祠宮升下以奉神主出入之地四祖廟在諸室之西奉僖順翼宣四祖神主耳每遇三年以孟冬祫饗即廟行禮次詣

諸室恭行祀典

景靈宮

景靈宮在新莊橋投北坐西乃韓蘄王世忠元賜宅基其子獻於朝改為宮向中興初高廟鑾輿幸此四孟朝獻俱於禁中行禮紹興年間羣僚奏景靈宮以奉祖宗衣冠之游即漢享廟也今就便殿作朝設位以饗未副廣孝之意遂詔臨安府同修內司相度以蘄王宅基修蓋宮廟殿門扁曰思成前為聖祖殿宣祖至徽宗殿居

中東西廊俱圖配饗功臣像於壁元天聖后與昭憲太后而下諸后殿居於後朝家欲再廣殿廡劉氏餘地其子孫復獻遂增建前殿五楹中殿七楹後殿十七楹自是齋殿進膳更衣寢殿次第俱備焉咸淳年間再命帥臣重修各殿度廟親洒扁目自聖祖宣祖太祖至理廟十六殿曰天興天元宣武大定熙文美成治隆大明重光承元瑞慶皇德系隆美明垂光章熙之扁自元天聖后至楊太后十五殿曰保寧太始儷極輝德衍慶繼

仁徽音坤元柔儀順承續德順嗣徽元順體德之扁宮

後有

闕

自東齋殿西循廡而右為大堂三臨池工左右

為明明樓旁有蟠苑亭堂南為西齋殿過郊裡恭謝設
宴賜花於此西有流杯堂跨水堂梅亭北為四并堂又
有橘拜修竹四時花果亭宇不能備載宮南建崇裡館
命道流以奉洒掃晨香夕燈之職仍設內侍官提宮事
務及宮司黃成兵侍衛之按朝野雜記太廟以奉神主
一歲五饗朔祭而月薦祈其五饗命宗室諸王奉禮朔

祭以太常卿行事景靈宮以奉塑像歲行四孟饗主上
親祀之帝后太后忌宰臣率文武官僚行香僧道作法
事后妃六宮亦皆繼往天章閣奉繪像時節朔望帝后
生忌日皆徧薦內臣行禮內庭欽先孝思殿亦奉神御
主上每日炷香凡朔望帝后忌辰節序皆親行酌獻之
禮太廟之祭以行俎豆禮景靈宮祭以奉牙盤禮天章
閣欽先孝思殿以奉常饌行家人之禮

萬壽觀

萬壽觀在新莊橋西紹興間建殿觀宇以太霄殿奉昊天寶慶殿奉聖祖長生殿奉長生帝西則純福殿奉元命後殿十二楹為二十二室奉太祖以下曾聖宮章武殿應天璇運皆塑像以存東都遺制前殿東有真廟室扁曰延聖章惠后室扁曰廣闕溫成后室扁曰寧華四孟朝獻畢上由御圓詣本觀詣殿行燒香禮景定改道院齋閣以奉皇太后元命觀東建神華館命羽士焚修

御前宮觀

御前宮觀在杭城者六湖邊者三多是潛邸改建琳宮
以奉元命或奉感生帝屬內侍提舉宮事設立官司守
衛兵士凡宮中事務出納金穀日膳道衆修崇醮款凡
有修整宮宇及朝家給賜銀帛殿閣貼齋錢帛並皆主
繼給散羽士但沾恩甚隆外觀皆不及也東太乙宮在
新莊橋南元東都祠五福太乙神也駐蹕於此以北隅
擇地建宮以奉禮官討論宜設位塑像按十神者曰五
福君基大游小游天一地一四神臣基民基直符凡行

五宮四十五年一移所臨之地歲稔無兵疫紹興間命
浙漕度地建宮凡一百七十四區殿門扁曰崇真大殿
扁曰雲休挾殿扁曰瓊章寶室元命殿扁曰介福三清
殿扁曰金闕寥陽齋殿扁曰齋明火德殿扁曰明離兩
廡俱繪三皇五帝日月星宿岳瀆九宮貴神等與從祀
一百九十有五遵太平興國舊制每祀用四立日設籩
豆簠簋壘如上帝禮兩廡以次降殺車駕遇四孟朝饗
嘗親詣焉孝廟又建元命殿扁曰崇禧淳熙建藏殿扁

曰瓊章寶藏鐘樓扁曰瓊音之樓理廟建長生殿奉南
極度宗建通真殿以奉佑聖中祐殿奉元命順福殿奉
太皇元命蓋易長生名改為延壽俱宸扁也又北辰殿
奉北斗崇真館在宮南有齋八曰觀妙潛心泰定集虛
順真集真洞徽虛白館有小園亭扁武林在宮後小坡
山乃杭之主山也

西太乙宮

西太乙宮在西湖孤山淳祐間太史奏太乙臨梁分蓋

請用天聖故事令於國城西南別建新宮以順方向於是擇八角鎮地建宮奉安遂析延祥觀地為宮以涼堂建正殿扁曰黃庭之殿殿門扁曰景福之門安奉太乙十神帝像東有延祥以備臨幸其外扁曰福祥之門凡宮之事儀四立祀典皆如東太乙例遵行咸淳間以德輝堂為元命殿明應堂為太皇元命殿迎真殿在宮之右有齋者二曰通真養素宮中舊有陳朝檜至今七百五十餘年矣蘇東坡嘗為僧志詮作詩以記側有小亭

孝廟宸翰其詩石刻於亭下曰道人手種幾生前鶴骨
龍姿尚宛然雙榦一先神物化九朝三見太平年忽驚
華構依岩出乞與佳名到處傳此栢未枯君記取灰心
聊伴小乘禪

佑聖觀

佑聖觀在興禮坊西元孝廟舊邸紹興間以普安外第
設生光廟乾道年間又開甲觀之祥淳熙歲詔改為道
宮以奉真武紹定重建觀門曰佑聖之觀殿曰佑聖之

殿藏殿扁曰瓊章寶藏御製真武贊及宸翰黃庭經皆刻之石以賜后殿奉元命西奉孝廟神御即明遠樓舊址也孝廟少年時題杜甫詩曰富貴必從勤苦得男兒須讀五車書理宗又書全篇鏤於東宮廳屏風上曰碧山學士焚銀魚白馬卻走深岩居古人已用三冬足年少今開萬卷餘晴雲滿戶團傾蓋秋水浮階溜決渠富貴必從勤苦得男兒須讀五車書延真館在觀之右命道流修晨香夕炬之供館有道紀堂虛白齋

顯應觀

顯應觀在豐城門外聚景園之北處潮之東水西面遠觀觀額宣和所賜靖康年間高廟為康邸出使至磁州神馬引而南建炎初秀邸妻夢神畀一羊謂曰以此為讖遂誕毓孝廟是由累朝祠祀彌謹殿中為顯應之殿其神位曰護國顯應興聖普佑真君高廟為書殿扁且揭以御名昭其敬也孝廟宸書寶章瓊藏之扁理廟書洞古經以賜刻石寧廟御題觀碑其額以表功忠觀之

東有崇佑館

四聖延祥觀

四聖延祥觀在孤山舊名四聖堂道經云四聖者紫微
北極大帝之四將號曰天蓬天猷翊聖真武大元帥真
君元是顯仁韋太后繪像奉事甚謹朝夕不忘香火高
廟為康邸出使將行見四金甲神人執弓劍以衛紹興
間慈寧殿出財建觀侍奉遂於孤山古刹徙之為觀次
年內庭迎四聖聖像奉安此觀觀額詔復東都延祥舊

名殿扁曰北極四聖之殿殿門扁曰會貞之門三清殿
扁曰金闕寥陽法堂扁曰通真元命閣扁曰清寧皆理
廟奎墨藏殿扁曰瓊章寶藏孝廟親墨有堂扁曰瀛嶼
元是涼堂扁曰建西宮以堂為黃庭殿別創新堂以此
扁奉之觀有瑞真道館即延祥觀門也

三茅寧壽觀

三茅寧壽觀在七寶山元三茆堂因東都三茅寧壽之
名賜觀額寧壽觀殿扁曰大天奉三茅真君像觀中有



三神御殿觀中曾蒙賜三古器玩皆希世之珍一曰宋鼎乃宋孝武帝之牛鼎以祀太室之鼎二曰唐鐘係大唐常州澄瀋觀舊物內庭出內帑金帛易以賜之禁中每聽鐘聲以奏寢興食息之節三曰褚遂良書小字陰符經此物宣取復賜賈秋壑觀之外曰東山為殿以奉元命有亭扁曰賓俯見日出

闕

菴扁曰仁壽

開元宮

開元宮在太和坊內祕書省後元寧廟潛邸為道宮向

東都有開元陽德觀以奉火德嘉泰年間詔以嘉邸改
克開元宮儀制皆厪佑聖觀扁曰明闕之殿祀以立夏又
詔臨安府即殿左別建伯宣明王殿遂徙大宗正司他
所悉以址為宮朔寧廟神御殿又有璇璣殿奉北斗易
扁曰北辰衍慶殿以奉真武順福神佑二殿奉元命皆
嘉明殿奎畫宮北建陽德館以存修真之道侶

龍翔宮

龍翔宮在後市街元理廟潛邸舊所靖惠王府詔建道

宮賜名龍翔以奉感生帝大門扁曰龍翔之宮中門扁曰昭符之門殿扁曰正陽之殿禮官討論祀典以正月上辛日差侍從三獻官等升為上祀行禮備牲牢禮料用十二籩豆設祭歌官架樂舞受誓戒望祭齋宮行事內牲牢依祀天地禮例用羊豕所有儀像服色制度有靈體殿廡下畫像可遵闕議以龍翔宮奉感生帝既屬羽流合用齋醮之法其正月工辛日望祭自如其舊奉旨從之宮之左曰福慶殿以待車駕款謁改為神御殿

正陽之後殿為醮殿宮西奉南貞館門曰南貞之館中
門曰啟晨之門三清殿扁曰三境儲祥後殿扁曰申佑
以奉元命西曰順福殿以奉太皇元命壽元殿奉南斗
景緯殿奉十一曜鐘樓扁曰和應之樓經扁曰疑真之
章藏殿扁曰琅函寶藏小位次以備車駕宴坐扁曰仙
源羽士之室扁曰澄虛內侍之舍扁曰泉石有高士三
齋曰履和順正全真

宗陽宮

宗陽宮在三聖廟橋東以德壽宮地一半建宮賜名以奉感生帝蓋此地前後環建王邸又建廟毓聖之所天瑞地符蓋大彰顯詔兩司相度建宮大門扁曰宗陽之宮中門扁曰開明之門正殿扁曰無極妙道之殿以奉三清順福殿奉太皇元命三清殿後為虛皇之殿直北有門扁曰真應之門中建毓瑞之殿以奉感生帝後為申佑殿奉元命通真殿奉佑聖自開明門內左有玉籟之樓景緯之殿壽元之殿右有藥簡之樓瓊章寶書北

辰之殿規制祀典並視龍翔宮行常以原饗回歸行款
謁禮有降輦殿曰福臨殿門曰福臨殿門進膳殿曰端
拱後有軒扁曰勁霜有圓建堂二曰志敬曰清風亭扁
曰丹立玄圃亭之北鑿石池堂扁曰垂福後曰清境圃
內四時奇花異木修竹松檜正盛宮西有介真館堂曰
大範觀復灌妙齋曰會真澄妙常淨俱廢宗奎藻

欽定四庫全書

夢梁錄卷八

夢梁錄卷八

欽定四庫全書

夢梁錄卷九

宋 吳自牧 撰

三省樞使諫官

三省即尚書省中書省門下省樞密院國初循唐舊制
置院於中省之北今在都堂東上為樞屬列曹之所蓋
樞密使率以宰臣兼領自知院以下皆聚於都堂治事
省院在和寧門北首舊闕寧寺也樞密院後建經武閣
係藏經武要畧之文中省門下後省在都堂後諫院在

後省之西檢正左右司在諫院之右向東承旨檢詳編修在樞密院三省樞密院監門大門之南三省樞密院架閣在制勅院後御史臺在清河坊內北向蓋取嚴肅之義內有朝堂即臺廳也自紹興以來未嘗置對有屬臺臣讞問則刑察就聽於大理寺問罪矣

六部

六部在三省樞密院之南部之中堂名曰論思獻納之堂

吏部掌天官依唐制以文武有官人分左右銓選名之
尚左尚右侍左侍右司封司勲考功凡七司以掌文武
注授到部推賞等事

戶部名為地官又稱民部掌天下州郡財賦得財用耗
而復衍倉廩虛而復實之事

禮部謂之春官掌禮儀討論典故講遺興禮大朝聘禮
慶賀朝儀生辰聖節元旦冬至朝會郊祀明堂合祀天
地祖宗典策秋享祭祀社稷封賜祀典祠廣功臣勳烈

配享及賜家廟祭器等事

兵部謂之夏官掌兵伍廂軍武舉投試武藝金吾街仗人司兵及大將出征告廟破賊露布鹵簿字圖若蕃夷屬戶授官封爵等事及天下地圖堡塞烽堠番夷歸服內附皆掌之又稱駕部掌輦輅車乘廐牧雜畜乘具傳驛之政令辨其出入之數再名庫部堂軍器儀仗鹵簿法式隨軍坊城什物及供帳之事是為四司主掌也刑部謂之秋官掌邦典之重輕民訟之疑惑重刑之出

入官僚之憲讞皆主之蓋民不問大小生死事體所係
四方訟刑得其平直發於天庭以稱其職唐制刑部分
為四司曰刑部曰都官曰北部曰司門是也

工部謂之冬官掌工役程式及天下屯田文武官職田
京都衢闕苑囿山澤草木畋獵漁捕運漕碾磑之事唐
制名為四曰工部曰屯田曰虞部曰水部一皆所總也

六部監門

六部監門在六部大門之左凡所掌之事隸於六部部

門受其出入之時以聽上稽訪門之司存蓋至是而愈重矣奉行列曹之命以正胥吏之失贊長貳之懲決以遵張官之意耳 六部架閣其庫在天水院橋掌六曹之文書主二十四司之案牘故官置庫掌其架閣皆無失悞矣

諸寺

太常寺在羅漢洞掌奉常禮儀討論典故祭器太常樂器等事寺內有昭勲崇德閣閣上繪像文武功勳大臣

自忠獻趙韓王普以下二十五人於其上也

宗正寺玉牒所在太廟南玉牒建局以宰臣提舉從官
兼修撰宗正卿少以下悉預修宗藩慶系錄仙源積慶
圖等書檢討官亦以他職兼耳

大理寺在仁和縣西設卿少丞簿評事司直之官及治
獄都轄推吏等家屬皆居於寺內以嚴出入之禁掌朝
廷刑棘廷尉之職按法斷刑治獄推劾等事

司農寺在保民坊內國制以戶部掌國計而司農列卿

少丞簿贊矣如諸州府縣道每年上供及宰執百官軍糧宣限米斛皆委專官吏卒下各路州縣坐徵以應宣限支用也

大府寺在保民坊內係周官職總局二十有四如諸軍諸司糧審四院左藏二庫買務賣場及編奎兩司和劑惠民四局祇候鈔引院皆屬掌矣

祕書省

國史勅令附

祕書省在天井坊之左東都建於禁中紹興間以殿司

寨基建省有殿扁曰右文之殿祕閣在殿後傳奉御書
製書畫古器等兩廡列累朝制書石刻國史實錄院在
殿東提舉官各在殿西道山堂在閣後東西二閣監少
之位丞簿管職閣列於兩廊堂之前著作之庭在堂後
有小軒置石刻東坡畫竹於中西有四閣著作著佐之
位國史日歷所在著作庭東廡有汗青軒編纂會要所
在著作庭西廡日歷會安庫經史諸子書籍庫共七庫
俱列於殿外東西兩廡書列庫在著作庭之右後圃有

群玉堂以東坡畫竹真跡為屏有蓬萊庭

作亭

前為鑿

池度以石橋池上疊石為山又有亭者六扁曰芳香席
珍方壺含章茹芝繹志次有射圃美含章亭後有渾儀
基乃太史推瞻星象之用也勅令所在侍郎橋南專為
詳定編修諸司勅令蓋謹法度廣賢才耳

諸監

國子監在紀家橋太學之側設祭酒司業丞簿等官專
掌天子之學校訓導生員之職總掌國子太學事務生

員出入規矩考課試遵訓導天子視學皇太子齒胄則
講議釋奠等禮也監廳繪魯國圖東西為丞簿位後看
書庫官位中為堂繪三禮圖於壁用至道故事有圃亭
扁曰芳潤丞錢聞詩扁以隸古書板庫在中門內

將作監在保民坊設監少丞簿掌計料監造官司營房
舍屋皆隸焉蓋漢制將作大匠沿襲秦官亦少皞氏以
五雉為五工正以利器用唐虞共工周官考工之職也
軍器監在保民坊監有長貳丞簿之官率屬治與唐六

典建官不殊掌製造御前軍器別置提舉提轄等官蒞其役近年專委殿岩而監製本監蓋以省也

大宗正司

大宗正司在天慶坊內以魏憲惠王府舊趾築之掌親屬宗廟之事自漢魏隋唐迄於宋因而不改以皇族官位高有德望者而領之又以本族尊高為判本司又增同知以為之輔宗司有閣扁曰屬籍之閣于以見宗屬蕃衍盛大而已

省所

茶鹽所會子所公田所封樁安邊所並在三省大門內
職以都司官兼提領舊有安邊所創於嘉定初專克拘
催簿緣家產更有市權所牙契所後因吏胥蠹弊走卒
繁擾遂廢其名撥入封樁所以併掌之今有創市舶所
官府察見吏姦亦行省罷矣

六院四轄

登聞檢院鼓院始建於和寧遂移於麗正左右闕庭

作

亭之南左檢院右鼓院按唐舊制後四軌以通下情名曰崇仁司諫申明招賢遵體以使四方賢才便其上達都進奏院在朝天門外掌邦國傳送之事以鈐轄諸道傳遞官兵則周官行夫其職也

官告院在部門之北士大夫自一命以下至於公卿王爵軍卒一資以下至於節鉞告命皆隸院給之如文則吏部武則兵部宗戚及命婦司封屬之考校勛績司勳掌之凡四司皆集本部出詔耳元豐改制俱悉吏部行

文武告命鈔而蕃官兵

隸改作吏

部自後皆歸吏部右選

文思院在北橋東京都舊制監官分兩界曰上界造金銀珠玉曰下界造銅錢竹木雜料然兩界監官廨舍毋得近本院隣牆並壁居所以防弊欺也但金銀犀玉工巧之制綵繪裝紉之飾若輿輦法器器具等皆隸焉

諸司諸軍料糧院在洋沙坑七官宅廢屋諸司諸軍祭計院在保民坊內舊馬軍教場基置院且如料糧院者乃諸司諸軍仰上之祿均也尤不可不嚴設官置吏故

其專心致意支撥無差矣

審計院者自宮禁朝廷百僚以下至於內侍御士及於諸軍兵卒凡賦祿者以式法審其名數而其辟名者唯郊祀賜緡已乃審錄有疑予則召以法凡四方之計籍工於大農則逆其會凡有司議調度會賦出則諏焉

榷貨務都茶場通在橋東蓋國初循唐制舊以九路之漕自達於維去則貨茶回則轉鹽諸路留而庾之官納鈔引以便商價但鈔引之法通行則設官專職主之課

行事繁官曹之選於斯重矣

雜買務雜賣場在榷貨務內唐制謂之官市宋初為市
買司太平興國年間方更名雜買務奉禁中買賣而平
其值南渡後合局於此凡宮禁月料朝省紙劄文思製
造和劉修合封樁所積編估以時其直打套以籍其數
而就售焉又置提轄總其務耳

左藏庫有東西二庫在清湖橋又韓世忠所獻賜第基
建庫東庫則掌幣帛駝紬之屬西庫則掌金銀泉券綵

續之屬蓋朝廷用度多靡於澹岳燭湖之江淮之賦則歸於四總領餉諸屯軍則東西兩庫歲入絹計者率百四十萬以緡計之率一千萬給遣大軍居十之七宮禁百司祿賜裁三有非泛浩繁之費則請于朝往往出內帑橋以補其闕耳

封樁上庫在三省大門內封樁下庫在左藏庫中門安邊太平庫在下庫南蓋封樁上庫肇於孝廟之時以備緩急支撥又分戶部錢物隸本所則有上下庫之別上

庫窠名者曰折帛總制增鹽三分鹽袋增額不排辦人使下庫窠名者曰煮酒酒息營田鹽塲蘆柴冊江江沙田額五釐關子為數五夥中因文移緩弊罅多諸郡網額虧數甚矣哉

三衙

殿前司在鳳凰山八盤嶺中置衙有御書閣凝香堂整暇堂山之工為月岩有亭扁曰延桂最高處曰介亭崖石嶙峋亭之後為冲天樓極高江海湖山奇偉之觀

侍衛馬軍司移屯建康以行司邊帥兼領元有帥衙在保民坊內改為寺監公宇

侍衛步軍司在鐵冶嶺西衙有御書閣湖山堂錦綉樓相公井

閣職

閣門在和寧門外掌朝參朝賀工殿到班官等儀範工有知閣簿書宣贊及閣門祗候寄班等官

四方客省館在東華門北客省者掌收接聖節建奉香

及賀表外國使人往來接伴之禮

四方館者掌收接諸州府郡朔望正冬賀表及大禮賀表等事

御前忠佐軍頭引見司在文思院後有內等子營以正廳知閣提點幕官以大使臣為幹辦司官

監當諸局

車輅門外院在嘉會置庫安玉輅及平等車

製造御前軍器所在禮部貢院之西改隸殿司所管工

役每季所製器納內庫萬全三指揮東西作兩營在所
之東北

編估打套局在左藏庫門內

惠民利濟局在大府寺內之右製藥以給惠民局合署
臘藥以備宣賜

太平惠民局置五局以藏熟藥價貨以惠民也南局在
三省前西局衆安橋北北局市西坊南南外局浙江亭
北外二局以北郭稅務兼領惠民藥局收贖

草料場在天水院橋西有厰十眼受畿內所輸稻麥豆

以給驥驥

闕

馬二院及宰執三衙之馬

合同場在過軍橋之下掌茶鹽鈔引合同

會子庫在權貨務置隸都茶場悉視川錢法行之以務
門兼職以都司官提領日以工匠二百有四人以取於
左帑而印會歸庫矣

造會紙局在赤山湖濱先造於徽城次成都以蜀紙起
解後因路遠而弗給詔杭州置局於九曲池遂徙於今

安溪亦有局仍委都司官屬提領但工役經定額見役者日以一千二百人耳

交引庫在太府寺門內專印造茶鹽鈔引遂請丞簿食押

法物庫在梅家北掌祭祀法服朝服冠珮帶舄及大禮明裡旗襜衫袍等內侍領其職

度牒庫在油車巷掌僧道二流承恩勅牒

市舶務在保安門外瓶場河下凡梅商自外至杭受其

券而考驗之又有新務在梅家橋北

司農排岸司在前洋街掌狗卸諸州郡宣限綱運檢察

搜空而繫其不登岸者

岸作數

三省樞密院激賞錢庫在俞家園激賞酒庫在錢塘縣
南

左右騏驎二院在漾沙坑兩院以馬二十四匹為額每
月朝參各院以御馬三匹至和寧門立於南向朝罷而
回院

象院在嘉會門外御馬院養餵安南王貢至象三素左右騎御直在七官宅山上

左右教駿營在麗正門左右御馬院使臣營銀在嘉會門外

牛羊司在樞貨務後掌御膳及祭之牲有滌宮六和塔之南

諸倉

省倉上界在天水院橋北其廩有八眼受納浙右米以

克上供及宰執百官親王宗室內侍仍支給王城班直
省部職員

省倉中界在東青門外菜市塘有廩三十七眼皆受納
浙右苗綱經常和糴公田椿積等米以供朝家科支農
寺宣限凡諸軍諸司三學及百司顧券諸局工役等人
皆給焉

省倉下界在東倉鋪卽於舊址極廣袤朝家更修乃析
三之二建廩廳八十眼

豐儲倉在仁和縣側倉橋東以公田浩瀚諸倉不足以受納以豐儲增創成廩百眼

豐儲西倉在餘杭門外佐家橋北其廩五十九眼

端平倉在餘杭門外德勝橋東石儲漕糴後歸農寺蒞以京局官而領之咸淳間重修有木榭扁曰介然蓋取太倉箴語而併箴刻於石有廩五十六眼

淳祐倉在餘杭門內斜橋南元祐以儲米糴於帥司其後朝家撥支賑糴百姓自後付農寺以給諸軍諸司有

厰一百眼

平糴倉在仙林寺東卽以儲關安米今農米皆入焉

咸淳倉在冬青門內後軍寨北議增建廩以儲公田歲

入之米買粳華廢圃及以內酒庫柴炭屋關卽司建

倉厰一百眼歲貯公田米六百萬餘石凡諸倉支納下

卸自有下卸指揮兵士過日分支遣皆至祇役又袋自

有賃者應辦如遇支界日倉前成市水陸壅塞諸軍校

給打諸糧不許雇人搬擔須視於厰中肩出倉外此祖

宗立法如此

內司官

內侍省知省都知御帶御藥苑使門司殿長閣長內轄
內監丞受隨都知下都監儀令上名扶持直掌權苑提
舉提轄御前諸宮觀提點皇城司御輦馬御馬院兼提
舉諸內司庫藏司所等處更有聽喚一百員團練四員
兩攢宮宮使隨父旨教小真殿一百員內宮散祗候不
記多數各有所轄職名主管事務

內諸司奉安

皇城司禁衛所符寶所主管大內鑰匙庫御藥院內東
門司內通進司御前軍器庫睿思設庫內藏庫奉宸庫
內軍器庫南廊庫安故庫生料庫果子庫香藥庫進奉
庫殿中省後苑御膳所御厨六尚局翰林司儀鑾司八
作司修內司御前內轄司東西庫南北庫甲仗庫法物
庫蜜煎庫內司綱房青器窰內司備內庫御前應奉所
萬壽香所御服所褰御所絲闕所腰帶所八作司意思

房燈局御馬院教樂所天章閣樂器庫翰林書藝局道
場庫祇候庫御醋庫主管往來國信所東庫御輦院車
輅院皇城輦宮營驕院教唆營騎從馬院象院大輦
院內轄司濠寨司織染所奉安所御酒庫主管翰林醫
官庫太醫局合同憑由司良馬院使臣院快行營黃院
子營皂院子營輕繫庫外庫御前諸宮觀太廟營景靈
萬壽宮老兒營慈元殿庫皇后殿庫吳益國位庫淑妃
昭修容儀美人才人諸位庫以上並是內侍官兼職提

勲提舉等職外有皇城司御馬院象院係知閣御帶環衛官兼領幹辦之職其餘外庫院幹辦之官係右選官領其職也



夢梁錄卷九

欽定四庫全書

夢梁錄卷十

宋 吳自牧 撰

諸官舍

左右丞相參政知樞密院使簽書府俱在南倉前大渠口侍從宅在都亭驛東臺官宅在油車巷省府官屬宅在開元宮對牆卿監郎官宅在俞家園七官宅在郭婆井五官宅在仁美坊三官宅在潘閬巷十官宅在舊睦視坊六房院即後省官所居處在湧金門東如意橋北

五房院即樞密院諸承旨所居處在楊和王府西也

府治

臨安府治在流福坊橋右州橋左首亭扁曰手詔亭右首亭扁曰迎春左入近民坊巷節推察判二廳次則左司理院出街右首則右司理院府院及都總轄房入府治大門左首軍資庫與監官衙右首帳前統制司次則客將客司房轉南入簽廳都門係臨安府及安撫司僉廳有設廳在內僉廳外兩側是節度庫鹽事所給關局

財賦司牙

闕

局戶房將官房提舉房投南教場門側曰

香遠閣閣後會茶亭閣之左是見錢庫分使庫搭材親
兵使馬等房再出僉廳都門外投西正衙門俱廊俱是
兩司點檢所都吏職級平分點檢等房正廳例帥臣不
曾坐蓋因皇太子出判於此臣下不敢正衙坐正廳後
有堂者三扁曰簡樂清平見廉堂後曰聽雨亭左首誦
讀書院正衙門外左首曰東廳每日早晚帥臣坐衙在
此治事廳後有堂者四扁曰恕堂清暑有美三桂東廳

側曰常直司曰點檢所曰安撫司曰竹山閣曰都錢激
賞公使三庫庫後有軒扁曰竹林軒之後堂扁曰愛民
承化講易三堂堂後曰牡丹亭東廳右首曰客位左首
曰六局房祇候書表司親事官虞候授事等房而已府
治外流福井對及仁美坊三通判安撫司官屬衙居焉
府治前市井亦盈鋪席甚多蓋經訟之人往來駢集買
賣要鬧處也

運司衙

西浙運司衙舊在雙門北為南北二廳今邊豐像門南渡子橋西普安橋為東西二衙曰東衙有寬民堂福星樓節闕堂振襟堂堂側建榭曰西衙有周咨堂公生明堂繡春堂仁惠堂堂有栽修竹而圍之運司僉廳提領犒賞酒庫所俱在運司衙門主管文字幹辦公事在俞家園主管帳司廳在戒子橋之北

后戚府

昭慈聖獻孟太后宅在後市街顯仁章太后宅在薦橋

東憲節邢皇后宅在薦橋南憲聖慈烈吳太后宅在州
橋東成穆郭皇后宅在佑聖觀後成恭夏皇后宅在豐
樂橋北成肅謝皇后宅在豐禾坊南慈懿孝皇后宅在
後市街恭淑韓皇后宅在軍將橋恭聖仁烈楊太后宅
在漾沙坑壽和聖福謝太后宅在龍翔宮側全皇后宅
在豐禾坊南其后戚宅元各賜家廟五室及祭器儀物
每四孟祭享官給以御闕兵治祭饌太常寺差奉常官
行贊相禮仍差主管官影堂使臣及兵給守之以子孫

世領祠事

諸王宮

吳王府在後洋街益王府在新橋秀安僖王府在後洋街漢王府在西橋莊文太子府在井亭橋沂靖惠王府在清湖北景獻太子府在鐵冶嶺榮文恭王府在佑聖觀橋東

周漢國瑞孝長公主在左藏庫西各賜家廟祭器歲時祭禮及影堂使臣主奉官兵級等循戚宅列制行之矣

家廟

忠烈張循王府在清河坊賜廟祀循王以上五世祖頒
祭器法式聽其自造仍差主管一員影堂使臣二員兵
級二十七名以子孫世領祠事忠武韓蘄王府在前洋
街賜廟祀頒祭器惟賜銅爵勺各一餘竹木頒圖飾作式
聽其自製一應事儀如前制同忠勇劉鄩王府在明慶
寺南建廟賜祭器並如前式忠烈楊和王府在洪橋清
河坊賜家廟與祭器下將作監造以賜歲時行禮官給

厨兵太常遣贊相以奉常餘皆如前制行太傅平章魏國公賈秋壑按舊典賜茅及家廟在葛嶺集芳園改建廟奉五室同宇以饗四孟月祭器皆尚方所賜凡點領官吏洒掃兵士與花果月頒之隸版曹及京兆府如在京賜諸勛功廟儀左奏行

館驛

樟亭驛即淞江亭也在跨浦橋南江岸凡宰執辭免各出居此驛待報矣向有白樂天先生往驛訪楊舊曾賦

詩曰往恨今愁應不殊題詩樑下又踟躕羨兄獨夢見
兄弟我到天明睡亦無夜半樟亭驛愁人起望鄉月
明何處見潮水白茫茫北郭驛亭在餘杭門外北郭
稅務之右都亭驛在候潮門裏泥路西侍從宅側次
為館伴外國使人之地也

本州倉場庫務

鎮城倉常平倉糯米倉俱在餘杭門外師姑橋鹽事所
都鹽倉在艮山門外天宗鹽倉在天宗水門內所轄諸

鹽場十有二曰湯鎮仁和許村鹽官南路茶糟錢塘新興蜀山巖門上管下管等場又新興已下立場西興錢酒二場皆隸焉交木場在龍山抽解竹木場在浙江亭北又三場在江漲橋南餘杭塘上西關三路也城西外場共二十有一處以便諸官廳及民廣排曰發賣鐵場炭場船場鑄冶場在東青門外北瓶場糴場在餘杭門外賣酒局在豐儲倉邊家渡之東交錢局在府治後都錢庫激賞庫軍資庫常平庫公使錢庫公使酒庫甲仗

庫書版庫公使醋庫俱在州衙內回易庫在薦橋北外
有公使醋子庫於城內外十有一庫耳或自沽賣止曰
納息錢於點檢所樓店務在流福橋北有官設吏令宅
務合於人員收掠民戶年納白地賃錢稅務凡五處名
曰都稅務浙江稅務龍山稅務北郭稅務江漲稅務但
州府雖有稅務之名則朝家多有除放以便商賈諸貨
壅於杭城具都作院在白魚池之側運司亦有木稅場
在杭城外共人場也船場與架閣庫俱在薦橋門外提

領犒賞酒庫所在樓店務之側

點檢所酒庫

點檢所官酒庫各庫有兩監官下有專史酒匠掌其役但新煮兩界係本所關給工本下庫醞造所解利息聽充本府贍軍激賞公支則朝家無一毫取解耳曰東庫清煮俱為一在崇新門裏有酒樓名之太和廢之久矣曰西庫又名金文正庫清界庫在三橋南惠廷橋側煮界庫在湧金門外有酒樓扁之曰西樓南庫元名昇陽

宮煮界庫在社壇南新界庫在清河坊南酒樓扁之曰
和樂北庫煮界庫在祥符橋東清界庫在鷺鴨橋東酒
樓扁之曰春風曰中庫在衆樂坊北造清界有酒樓扁
之曰中和煮庫在井亭橋北曰南工庫呼為銀甕子庫
煮酒庫在東青門外造清界庫在睦視坊北酒樓扁之
曰和豐曰南外庫造清界庫在便門外清水閘造煮界
庫在嘉會門外名之雪醕庫曰北外庫造煮界庫在江
漲橋南清界庫在左家橋北酒樓扁之曰春融曰西溪

庫清煮兩界俱在九里松大路乃一門分兩庫耳曰天
宗庫造清界在天宗水門裏煮界庫在餘杭門外上閘
東曰赤山庫造清界庫在赤山教場煎煮庫在左軍教
場側曰崇新庫清煮西界俱在崇新門外曰徐村庫在
六和塔南徐村市中其諸庫皆有官名角妓就庫設法
賣酒此郡風流才子欲買一笑則徑往庫內點花牌惟
意所擇但恐酒家人隱庇推託須是視識妓面及以微
利啗之可也又有九小庫如安溪餘杭奉口解城鹽官

長安許村臨平湯鎮更有碧香諸庫如錢塔門外上船
亭南名為錢塘正庫有樓扁曰先得錢塘縣前名錢塘
錢庫鵞鴨橋北曰北關庫正在醋坊巷口也西橋東曰
煮碧香庫禮部貢院對河橋西曰藩對棧庫外有藩對
正庫在常州無錫縣並隸臨安府點檢酒所提領耳

安撫司酒庫

安撫司所管一道酒庫如餘杭縣開林酒庫石瀨步東
西二酒庫臨安縣青山桃源二酒庫外有安吉州德清

縣市名為德清正清庫五林關累曰德清東西二酒庫

安吉州歸安縣曰埭市東西二酒庫嘉興府華亭縣曰

上海酒庫

廂禁軍

臨安居輦轂之下蓋倚以為重武備一日不可闕而守
師所統則建炎之舊制至防虞一軍又必藉禁衛之士
別為部伍三衙之兵亦聽帥臣節制以倡率之姑以兵
制軍號一一述之使知衛兵各有兵統耳曰東南第三

將自太祖朝分隸駐劄寨在東青門內元管十指揮後
撥威果二十八指揮雄節九指揮于平江外見存者威
節第一第四第五第六指揮雄節第八第十六指揮全
捷第二第三指揮共統八指揮軍也曰京畿第三將元
係東京畿縣陳留雍丘尉氏鄆陵陽武屯駐兵後劉俊
統卒來捕陳留存留駐劄營在東青門裏所統武騎兩
指揮勇廣四指揮廣捷三指揮忠節水軍饒猛伸威雄
勇雄威各管一指揮効忠三指揮共統十七指揮軍也

曰兵馬鈐轄司兵馬勇節威果全捷三指揮宿州龍騎
歸遠二指揮因討睦寇留屯隸鈐轄司所管矣曰廂軍
崇節捍江修江都作院小作院清湖閘開湖司北城堰
西河廣濟樓店務長安堰閘秤斗務北城鼓角匠橫江
水軍船務牢城各指揮兵士計兵士二萬五百八十七
名之額曰城東城西外沙海外管界茶糟南蕩東梓上
管褚山仁和鹽官黃灣硤石奉口許村巡檢司十六寨
計兵卒一千三百四十四名之額

防虞巡警

臨安城郭廣闊戶口繁夥民居屋宇高森接棟連簷寸尺無空巷陌壅塞階道狹小不堪其行多為風燭之患官府闕坊巷近二百餘步置一軍巡鋪以兵卒三五人為一鋪遇夜巡警地方盜賊煙火或有鬧吵不律公事投鋪即與經廂發覺解州陳訟更有火下地分過夜在官舍第宅名望之家伏路以防盜賊蓋官府以潛火為重於諸坊界置立防隅官屋屯駐軍兵及於森立望樓

朝夕輪差兵卒卓望如有烟燧處以旗幟指其方向為號夜則易其燈若朝天門內以旗者三朝天門外以旗者二城外以旗者一則夜間以燈如旗分三等也曰東隅有望樓在柴垛橋都稅務南曰西隅有望樓在白龜池曰南隅有望樓在關山至德觀後曰北隅在潘閭巷內曰上隅在大瓦子後三真君廟前曰中隅有望樓在下中沙巷蠟局橋東堍曰下隅有望樓在修文坊內曰府隅有望樓在府治側左院牆邊曰新隅在長慶坊曰

新南隅在候潮門裏東曰新北隅在餘杭門裏曰新上隅在侍郎橋東皮場廟側曰西南隅在壽域坊仁王寺前曰南上隅在麗正門側儀鸞司相對曰城西隅在錢湖門外清化橋曰城北上隅左北郭稅務橋曰東北下隅有望樓在北新橋北曰錢塘隅有望樓在水磨頭放生亭後曰新西隅在九里松麴院路口曰海內隅在浙江亭南油局曰外沙隅在候潮門外外沙巡司曰城東隅在新門外城東巡司曰茶糟隅在東青門外茶糟巡

司如遇烟燄救撲帥臣出於地分帶行府治內六隊救撲將佐軍兵及帳前四隊親兵隊搭材隊不併聽號令救撲並力撲滅支給犒賞若不竭力定依軍法治罪


帥司節制軍馬

浙西安撫司節制殿步兩司軍校雖係帥司節制元無統屬遇有速欲調遣及救撲烟燄須同朝旨調遣常不及事遂請於朝省得旨行下殿步兩司各差官兵千人各委統制官二員帶行正任兵馬鈐轄都監及添差兵

馬鈴轄副都監職任於城內四壁置隅以備調遣復請
朝堂欲再於殿步二司差軍兵分任城外四壁防虞之
責遂行下各司再選精軍三百人各以統制官二員仍
帶本州鈴轄路分之職分任也並照城內四壁約束俱
隸帥司節制自後兩浙運司申朝得旨令分官城內外
北壁軍兵通行節制以便救撲且如防虞器具桶索旗
號斧鋸燈籠火背心等器具俱是官司給支官錢措置
一一俱備遇有救撲百司官吏便整隊伍急行奔馳駐

劉遺涌地方聽行調遣不勞百姓餘力便可勦滅如宰
執帥漕殿步帥臣間到地面指揮救撲百司官吏亦各
詣所隸官司守局以備不測其脩內司搭材等兵級亦
同內侍分頭救滅或火勢侵其官舍戚里之家及烜燼
畏威有傷百姓屋宇內庭累令天使馭馬傳宣諸司帥
臣速令將佐盡力撲滅毋致違慢如有違悞定行軍法
治之帥漕二司遇行救撲官發錢買水澆滅富室豪戶
亦喝錢闕軍士盡力撲滅不致疎虞若救火軍卒重

傷者所隸差官相視傷處支給犒賞差醫診治



夢梁錄卷十

欽定四庫全書

史部

夢梁錄卷十一至三

詳校官鴻臚寺少卿臣梁景陽

編修臣程嘉謨覆勘

總校官原任中允臣王燕緒

校對官中書臣袁文邵

謄錄監生臣江璉

謄錄監生臣康傑

欽定四庫全書

夢梁錄卷十一

宋 吳自牧 撰

諸山巖

大內坐山名鳳凰即杭客山也廟巷山名吳山又曰胥山上方多福寺名七寶山山前連者謂之寶蓮山進奏院後名石佛山太廟後名瑞石山妙果尼寺前名金地山漾沙坑小山名茆山淺山寶月寺前名寶月山八眼井前名娥眉山草場山御廚營山謂之寶山孝仁坊名

清平山府治名竹園山秀

闕

山一脈耳豐樂橋南有

狗兒山稱之而實無山跡此古老相傳東太乙宮後圃
內有小土山名虎林山建亭在其上扁曰武林即杭之
主山也城南令水峪上名包

闕

山有桃花關多貴官

園囿春間桃花數里皆豔色故杭人遊宴者夥嘉會門
外洋洋楊南名龍山又曰天龍山山西名月輪大慈二
山兒門名馬鞍五雲等山鐵井關謂之定山奉望山浮
山范村北鄉名排山楊村名巖山巫山頭名廟山又謂

之猱山水樂洞前名南高峯山九里松名靈隱山靈苑
山仙居山靈隱寺後山名北高峯山寺前名飛來峯白
猿峯稽留峯月桂峯蓮華峯漣巖巉岩靈鷲寺右青林
宕理公巖靈隱山南名葛塢米墅女兒山玉女巖龍井
山雲栖山范村諸塢山西湖堤上名孤山乃林和靖先
生修真隱居處其山聳立旁無聯附為湖山之絕勝也
錢塘界有栗山縣舊治南名巨石山石甌山壽星寺後
巾子峯山大佛寺名大佛石山張真君行宮前名霍山

興教寺後曰南屏山其山怪石聳秀中甯一洞工有石
壁如屏障可愛司馬溫公書於石云家人卦刻之見存
其跡矣淨慈寺對山名雷峯寺山後有慧日峯山龍井
山側名雞籠山高麗惠因寺前名赤山更有一峯聳出
衆山繚繞古木列垂森翠難描謂之玉岑山也報德寺
有山名鷓鴣峯無垢院有一峯如筆卓然而立故名卓
筆峯大麥嶺後花家山又名蛇山放馬場側靈石山東
山又名仙姑山王家橋試院後名西觀音山秦停山石

壁山西溪龍門山長壽鄉大悲山塢崇化鄉觀山黃社
茅滌楊梅等山城東北山臨平山桐扣山赤岸山臯亭
山青龍山母山佛石山石膏山大婆山白巖山方山芋
山楊山唐峯山近山大遮山烏尖山飲馬山安樂山龍
駒山法華山仁和縣界東北有黃鶴山永和等鄉超山
亭市龍珠山大旗山南北南鮑山三峯山洛山鵲眉山
烏頭山姥獨山赭石山馬嶧山其餘七縣山脈繚繞山
峯巍峩週圍數百里難以盡述矣 虎頭岩在錢塘門

外介於寶嚴定業寺後山葛澧錢塘帝都賦云岩則虎頭故老傳云此山舊有岩石突出如虎頭形吳越錢王納土後奏有望氣者云杭州西湖有虎頭形勝遂命匠鑿去其形兩赤縣有名岩者如連岩青林岩理公岩玉女岩象鼻岩佛手岩

嶺

八蟠嶺在大內後殿司衛山上萬松嶺在和寧門外孝仁坊西嶺上夾道栽松今第宅內官民居高高下下鱗

次櫛比多居於上白樂天夜歸賦詩有萬株松栢青山
上十里沙堤明月中之句又東坡蠟梅詩句有萬松嶺
下黃千葉鐵冶嶺在步司衙左虎翼營東紫坊嶺在漾
沙坑七官宅之側駱駝嶺在三茆觀之麓灌肺嶺在大
街清河坊北狗兒嶺在教睦坊內此二嶺舊有坡阜今
夷為大路而名存焉慈雲嶺西在方家峪東往郊壇路
有後唐石刻風篁嶺在錢塘門外放馬場西路通龍井
其嶺最高峻嶺上有亭名曰過溪又曰二老東坡賦詩

紀之又探梅詩有問信風篁嶺下梅又有界亭詩丹青
明滅風篁嶺之句分金嶺在錢塘舊治西狗頭嶺在舊
治北梯子嶺在方家峪南錢糧司嶺在城西巡司前五
嶺子在龍山之北白塔嶺在龍山東徐村嶺俗呼薑擦
子嶺鐺嶺馬牛頭嶺俱在錢塘定山北鄉牌山嶺在定
山南鄉五雲山嶺在徐村及雲栖山俱可往來大麥嶺
小麥嶺今在高麗寺西興步司右軍相連路通放馬場
嶺嶺有觀音閣對山有東坡同王渝楊傑張鑄元祐五

年三月三日遊三竺過麥嶺題名石刻存焉南高峯下
烟霞嶺葛嶺在西湖之西葛仙翁煉丹於此有初陽臺
高廟即其地創集芳園理廟以此園賜賈秋壑建第宅
家廟蓋賈公元有別墅在焉棲霞嶺又名劒門嶺亦名
劒門關在錢塘門外顯明院之北舊多栽桃花開時爛
然如霞故名之嶺下岳鄂王墓駝巘嶺在九里松東胭
脂嶺在九里松麴院路西石人嶺又名馮公嶺在靈隱
寺西大青嶺在東墓嶺南郎當嶺在大青嶺南黃泥嶺

在行春橋水竹塢步司前軍寨南胡家嶺在錢塘長壽鄉其嶺極峻峭有石井旱不涸歌樵嶺在慈山大石姥嶺在仁和界

諸洞

杭城內有洞者三青衣洞在三茆觀之後曰羅漢洞在勅令所北其洞廢之久矣今以名呼之曰金星洞在鳳凰山介亭下大廟亦有洞如其名也城外有洞者凡一十有七曰南高峯烟霞洞下曰水樂洞其洞前四望林

巖聳秀岩石笋峙洞虛窈渟涵如淵泉珠且清甜可掬
洞中有水聲如金石之音頃為楊谷郡王別圃案石築
亭最為幽雅歲時都人遊觀集焉厯年多蕪穢弗治水
樂音聲已絕賈秋壑以厚直得之增葺其景顧與其水
音秋壑俯睨旁聽悠然有契曰谷虛而後能應水激而
後能有聲令水瀦其中土壑其外顧振聲得乎亟命流
壑導瀦有聲自洞間出節奏自然二百年勝槩於今如
始也楊村巖山慈嚴寺之後名風水洞郊臺天真院有

二洞扁曰登雲曰靈化東坡和靖題名刻於石右赤山
殿司左軍寨尼庵側有洞名鐵牕樞洞天竺山有二洞
名呼猿龍漲烟霞石塢路大仁院有石屋洞極高大壯
如屋週圍鐫刻諸佛菩薩羅漢之像其寺正為佛殿朝
香夕燈之供焉瑯山名烟霞洞石屋寺側曰棲霞洞下
竺寺內有洞名香林臨平山有洞名龍洞尼庵後有洞
名蝙蝠細礪洞錢塘崇化名白龍洞其洞有龍居焉朝
家曾祈雨暘有感勅封侯爵為顯靈孚濟美號賜廟額

扁曰敏應掃帚塢護國仁王寺有洞不載其名仁和界
起闕有洞名海雲洞脩是乾濕洞建黑龍王祠祀之
古柳林楊和王園內名白雲洞蓋以坡陀擁土成之此
奪天之奇巧也

溪潭澗浦

杭郡係南渡駐蹕于此地倚山林抱江湖多有溪潭澗
浦繚繞郡境實難描其佳處自武林山之西名曰西溪
項者有郭祥正詩題詠曰西溪在湖外一派濯殘陽遊

子託漁船却愁歸路長九溪在赤山烟霞嶺西南通徐
村出大江北遠龍井矣安溪在錢塘去北關五十里溪
上有大遮山祠龍山在上古人相傳風雨之夕龍現珠
有光凌溪在錢塘長壽奉口溪在錢塘安溪之北十八
里 潭澗者寶月山寶月寺之西曰黑龍潭其潭莫測
深淺亢旱水不竭一名天井山下有天井蒼晴則潭水
碧色可愛將欲雨則水黑郡民入此候晴雨多驗頃者
白樂天曾祭龍神撰祝文曰黑龍惟龍其色玄其位次

其神壬癸與水通靈曰歷禱四方寂然無應今故虔誠
潔意致命於黑龍無水顧何依神無靈將恐竭澤能救
物我實有望於龍物不曰神龍豈無求於我若三日之
內雨一霧沛是龍之靈亦人之幸禮無不報神其聽之
仁和臨平鎮東湖曰白龍潭漁浦潭晏分輿地志在郡
西南龍遊潭在仁和皋亭山盍盂潭在南高峯及仁和
太平鄉石塘東玉兒潭在郡西五十里浣沙潭在仁和
臨平鄉羊鐵潭在艮山門外西湖三潭士人相傳於湖

中

關

浦者項鳳凰山下有柳浦咸淳志云隋志置郡
晉吳喜嘗遊軍此地參之諸文無考便門側名鐵幢浦
古今相傳吳越王射潮箭所止處立缺幢又有聞錢王
築塘時高下置鐵幢凡三以為鎮壓潮水則見其幢也
淳祐戊申帥司買民地置亭其上王荊公詩云憶昨初
為海工行日斜來往看潮生如今身是西歸客回首山
川覺有情靈隱浦自靈隱山南徂東臨澗江一派謂之
北浦今資國院前是也亦云靈隱步頭有詩詠曰有靈

何所隱深浦老蕪葭漁父一舟泊卻疑秋漢槎白石浦
鮮船渡浦楊村浦俱仁和臨江都澗者如合澗在靈隱
天竺之間十八澗在龍井山之西步司左軍寨後路通
六和塔寺石門澗參陸羽靈隱寺記舊有卧龍石橫
澗中有詩詠曰啟閉何人見湍流一澗分仙家無路入
空鎖石樓雲金沙澗在靈隱寺側自合澗橋繞寺山一
帶唐家衝石橋在軍寨門內至行春橋折入步司前軍
寨門由麴院流入西湖惠因澗在赤山高麗惠因寺側

秦少遊遊龍井曾濯手於澗題名記之云並湖而行出
雷峯度南屏濯足於惠因澗入靈石塢又得徑上風篁
嶺憩於龍井亭酌泉投石而飲之呼猿澗在靈隱山呼
猿洞之左右也

井泉

杭城內外民物阜蕃列朝帥臣常命工開鑿井泉以濟
邦民之汲庶無枯涸之憂吳山北大井曰吳山井蓋此
井係錢王時有韶國師始開此井為錢塘第一然山脈

融液源源所鍾不雜江潮之水遇大旱不涸天井巷舊
曰天井舊志云寶月山上亦有天井後廢之久矣萬松
嶺上沈婆井嶺下有郭公井鐵冶嶺北有郭婆井青平
山側有郭兒井壽域坊仁王院前有上四眼井長慶坊
竹竿巷曰下四眼井金地山步司寨前名曰鱔井清沙
灣有鰻井寶月山下上八眼井祕書省相對下八眼井
後市街大眼井六部前甜瓜井四方館北及南倉前各
有大井太學後及市西坊各名沈公井祥符寺中向吳

越王於寺內開井九百九十眼後改創軍器所陞塞僅存數井耳薦橋北有義井亦呼四眼井道明橋雙井豐樂橋西長惠井棚前亦有雙井梵天寺靈鰻井錢王廟前烏龍井六和塔南沙上曰沙井上以鐵井闌護之西溪有井名龜兒井方井淨慈寺前四眼井下竺藏院煉丹井武林山烹茗井清湖惠利井鐵冶嶺相公井甘泉坊相國井安國羅漢寺名西井又名成化井三省激賞庫四名井坊俗呼四眼井裴府前名小方井俗呼小眼

井惠廷橋西有井一者三呼沈公井曰金牛井曰惠廷
井州治前流福坊名流福井湧金門鑷子井自惠利而
至鑷子井計八井於西湖置水口引水歸城使民汲之
孤山有金沙井風篁嶺龍井有名賢題咏甚多秦少遊
題名石刻丞相鄭清之跋蘇東坡之記存焉治平寺葛
公雙井湯村路上觀音井小林蓮華院蓮華井仁和臯
亭馮氏井泉者以城外兩赤縣有冷泉醴泉溫泉並見
武林山玉泉在錢塘九里松北淨空院昨白齊末有靈

悟大師雲超開山說法龍君來聽撫堂出泉有小方池
深不及丈水清澈可鑒異魚泳游其中池中立祠祀龍
君朝家封公爵有白樂天詩云湛湛玉泉色悠悠浮雲
身開心對定水清淨兩無塵手把青藜杖頭帶白綸巾
興盡下山去知我是誰人真珠泉在大慈崇教院為張
循王真珠園內也靈泉在壽星寺前有亭而廣福院亦
有之金沙泉在仁和永和鄉東坡詩有細泉幽咽走金
沙之句孟泉詳於壽星寺卧屏泉見於鄭戩靈隱天竺

詩序中蕭公泉在靈隱寺後歲寒泉在龍井山崇因院
法華泉在南山滿覺寺參寥泉元祐年間此僧住上智
果寺寺有泉東坡以僧之名為泉名蓋東坡應夢記云
僕在黃州參寥自吳中來訪一日夢此僧賦詩覺而記
兩句云寒食清明都過了石泉槐火一時新後七年僕
出守錢塘此僧始卜居西湖智果院有泉出石縫間寒
食之明日僕與客泛湖自孤山來謁參寥子汲泉鑽火
烹黃蘗茶忽悟於夢詩兆於七年前衆客皆歎遂書始

末并題之非虛語也潁川泉在南高峯觀音泉者有三
法通傳燈真如三寺也噴月泉在南山暗竹園廣福院
定光泉在西山長耳法相院西定光庵側白沙泉在靈
隱寺西普賢院方丈之西其泉自白沙中出有詩詠曰
不見泉來穴沙平落細聲夜高寒月漾銀漢大分明周
公泉又名北插泉在湖州市下閘甘泉在城北童家巷
南惠泉在錢塘長壽鄉大者山惠泉寺冰谷泉在臨平
山寂光庵側寒泉舊名薦菊泉在錢塘門外嘉澤廟僧

錄泉在南山福聖院六一泉僕夫泉在孤山四聖太乙
道館園內大悲泉在工天竺茯苓泉在靈隱寺西無垢
院虎跑泉在大慈山持正泉在六和開化寺湧泉在霍
山行宮西清心院前山坡下高宗日遣人汲水入內瀾
茗寺中以朱闌護之味極清甘亢旱不竭天澤泉在麴
院小隱寺前有亭覆之安平泉在仁和安仁西鄉安隱
院有池扁曰安平泉池邊有亭東坡題詩曰策杖徐徐
步此山撥雲尋徑興飄然鑿開海眼知何代種出菱花

不記年烹茗僧誇甌泛雪煉丹人化骨成仙當年陸羽
空收拾遺卻安平一片泉城內有瑞石泉在料糧院北
瑞石山下今太廟南有井亭青衣泉在太廟後三節觀
園內武安泉在皇城司營水清甘有青石刻武安泉三
字俱按咸淳志所載而述之也

池塘

湧金池在豐豫門裏引西湖水為池吳越王元瓘大書
湧金池三字刻石識之其旁書清泰三年丙午之歲建

午之月特開此池有前輩賦詩曰湧金春色晚吹落碧
桃花一片何人得流經十萬家又云衆沼皆涵碧斯池
獨湧金寶光終夜見不是月華深聖母池在吳山中興
觀側以石闌護上建聖母廟白龜池在錢塘門裏沿城
南金牛池已廢仁和倉池在倉南明清池在大理寺議
廳池畔有潘閔詩刻白洋池在梅家橋南鴻雁池在龍
山北龍母池在錢糧司嶺金魚池在開化寺後山澗水
底有金銀魚放生亭池在西湖德生堂瑤池在錢塘門

外寶勝寺側今屬呂氏園有二飲馬池一在西溪飲馬
山下一在菜市門外廟子灣碧沼水池西水池在長橋
東錢湖門外在湖州市左八郎廟巷池廣三畝水清甘
人多汲飲有扁曰碧沼磨劍池臨平山下有片石俗傳
錢王磨劍於此宮城外護龍水池二十所自候潮門裏
南貼中軍寨壁宮城之東直至便門裏南水門北和寧
門外水池袤一百一十尺自是近南居民去水絕遠者
皆恃此防虞以為安矣城內外居民水遠去處官置防

虞水池者二十有二以便民之利 塘者如艮山門外尉司衙側名之五里塘艮山門外蔡官人塘月塘其塘地宜種瓜有周姓者擅其利土人呼月塘周家箕筒瓜是也上塘在殿司右軍教場側又在團園頭石塘北沈塘在北關門外又名沈家灣永和塘在仁和永和鄉地接古鼎湖白龍潭俗謂之三里陰水勢漲溢一遇卯風震蕩則數百頃中瞬息堙沒鄉民患之後得邑士倡其義役捐財以助修築塘成歲無水患邑宰范光命名曰

永和堤官河塘在北新橋之北接廣運河大塘又有一塘曰西塘袤一十八里抵安溪通四川驛路淳祐間並加築治至今無頽圯之患矣

堰閘渡

清河堰在餘杭門外稅務東裹沙河堰在餘杭門外仁和橋東澄水閘在西湖長橋南因鈔湖門內諸山之水分流為三道一以鈔湖門外北城下置海子口流水省馬院後為小渠引水直至澄水閘入湖又為三渠出於

湖皆有石橋後渠為居民湮塞然橋猶可記也西閘在赤山教場側龍山渾水閘清水閘在龍山浙江清水渾水二閘在便門外保安閘在小堰門外清湖上中下三閘在餘杭門外石函橋閘在錢塘門外水磨頭因湖水漲壅開此洩水出於下湖安溪化灣二斗門閘在錢塘縣北 浙江渡在浙江亭江岸對西興龍山渡六和開化寺山下對漁浦漁山渡在大朱橋及鹽倉前兩岸相望不遠湖勢可畏浙東士夫憚於渡漁浦者多由此渡

船頭在通江橋北周家渡在城內漆木巷司馬渡在油
蠟局橋蕭家渡在下中沙巷邊家渡在仁和倉東睦家
渡在豐儲倉西時家渡在德勝堰南

夢梁錄卷十一